

Ugovor o tržnici Arizona je jasan, obavezujući i pravedan

Supervizor za Brčko Henry L. Clarke se obratio predstavniku nekoliko vlasnika privatnog zemljišta na području tržnice Arizona i istakao da će njihova vlasnička prava biti poštovana, ali da im neće biti dozvoljeno da ometaju ugovor između Vlade Brčko Distrikta i "Italprojecta".

Ugovor o pravu građenja, finansiranju, projektovanju i upravljanju tržnicom Arizona između Vlade Brčko Distrikta i "Italprojecta" je zaključen 21. decembra 2001. nakon dugotrajnog i transparentnog postupka javnog tendera i prikupljanja ponuda. Postupak je bio otvoren za učešće i komentare svih zainteresovanih strana i stanovnika Distrikta.

Prema ugovoru, "Italproject" ima pravo da izgrađuje i upravlja svim zemljištem u granicama tržnice Arizona, kako to bude definisano odobrenim regulacionim planom. "Italproject" je pripremio takav plan i predstavio ga Skupštini Brčko Distrikta. Kada Skupština odobri regulacioni plan, Vlada Distrikta će preduzeti neophodne korake u cilju ispunjenja uslova ugovora i sprovođenja plana. Zemljište u privatnom vlasništvu unutar granica tržnice biće predmet odgovarajuće podjele u zone i eksproprijacije u skladu sa zakonom. Sadašnji vlasnici zemljišta mogu najbolje zaštititi svoje poslovne interese na tržnici Arizona ukoliko sklope ugovor sa "Italprojectom".

Izgradnja tržnice Arizona sa novom infrastrukturom i trgovačkim zgradama će uveliko uticati na poboljšanje zdravlja, bezbjednosti i kvaliteta života svakog pojedinca koji na tržnici obavlja djelatnost. Supervizor očekuje da će rekonstrukcija dovesti do sveukupnog povećanja obima poslovnih aktivnosti, čime će se povećati zaposlenost, prihodi i uplata

poreza za dobrobit Brčko Distrikta i njegove okoline. Ovakve prednosti za javnost i poslovne interese zaslužuju podršku svih nas.

Za detaljnije informacije obratite se službeniku za odnose s javnošću OHR-a Suzani Pejčić na telefone 049-205-666 ili 061-133-526.